



Senin, 15 April 2024

Ogen: Habakuk 3:1-19



Alu Teneng Ku Timai Paksa Tuhan



Kai nge si turah i bas ukurta dikune si idah lit kalak jahat nindas kalak bujur, lit kalak percian ncakapken kalak mehuli dengen ncakapken silang-lang. Pasti, kalak si mehuli ukurna beluh ertimbang, labo mungkin ibelana si jahat, ipujikenna kalak percikurak. Bagenda me geluh Habakuk, iidahna kinilabujuren si jadi nandangi bangsa Dibata. Paksa e bangsana sanga tertaban i Babil janah tuhu-tuhu kejam perbahanen bangsa e man Israel. I bas siakapna la payo, ertoto me Habakuk man Dibata. I je iturikenna pengangkan ras penandaina Dibata rikut ras arapenna. Ieteh ras iakuina perbahanen Dibata i bas paksa sienggo lepas. Emaka iarapkenna bageka min ibahan Dibata man bana paksa e, mekuah min ate Dibata aminna nembeh pe ate Dibata man bana. I bas situasi sibage rupana, Habakuk ngataken ia nimai paksa Dibata reh lako naluken imbangna-imbang sinakiti ras naban bangsana. Ndigan e? Dibata meteh paksana.

Habakuk nuriken arapenna, aminna batang ara la erbunga, batang anggur la erbuah, batang saitun la mereken asil, perjuma la rulih. Biri-biri mate dengen lembu keru bas karang. Enda kerina situasi si sitik pe la erbahan meriah ukur, situasi enda mara sireh kubas geluh, la saja musil la ndatken ulih tapi pe tuhu-tuhu la lit siman arapenken, la lit bahan makanan. Kecibal enda la erbahan ia putus asa. Iakuina tetap ia ermeriah ukur erkiteken lit denga Dibatana simereken pergegeh. Igambarkenna gegah si ialokenna eme: desken nahe belkih tetap paguh perdalanna, la celus amin erdalan i deleng meganjang. Belkih binatang si tetap megegeh aminna pe erdalan bas ingan si mesera, batu-batu ras sidebanna. Kalak sitek ras erpengarapen man Tuhan labo la jumpa perbeben ras tantangan nggeluh tapi ibereNa gegah gelah ngasup ngalaken perbeben. Timailah paksa Tuhan eme waktu si mehulina.